

An Eala Bhàn

Gur duilich leam mar tha mi 's mo chridhe 'n sàs aig bròn
Bhon an uair a dh'fhàg mi beanntan àrd a' cheò
Gleanntanan a' mhànrain, nan loch, nam bàgh 's nan srom
'S an eala bhàn tha tàmh ann gach latha air 'm bheil mi 'n tòir.

A Mhagaidh na bi tùrsach a rùn ged gheibhinn bàs
Cò am fear am measg an t-sluaigh a mhaireas buan gu bràth
Chan eil sinn uile ach air chuairt mar dhìthein buaile a' fàs
Bheir siantan na bliadhna sìos 's cha tog a' ghrian an-àird.

Air m' uilinn anns na truinnsichean tha m' inntinn ort, a ghraidh
Nam chadal bidh mi a' bruadar ort cha dualach dhomh bhith slàn
Tha m' aigne air a lìonadh le cianalas cho làn
'S a'ghruag a dh'fhàs cho ruadh orm a-nis air thuar bhith bàn.

Mas e 's gu bheil e 'n dàn dhomh on bhlàr gun till mi beò
Is gu faic mi 'n t-àite san deach mi m' àrach òg
Bidh sinne 's crathadh làmh againn is bilean blàth toirt phòg
'S mo ghealltan bidh pàighte dhut le fainne chur mud mheòir.

Oidhche mhath leat fhèin a rùn nad leabaidh chùbhraidh bhlàth
Cadail sàmhach air a' chul do dhùsgadh sunndach slàn
Tha mise 'n seo san trannsaidh fhuar 's nam chluasan fuaim a' bhàis
Gun dùil ri faighinn às le buaidh tha 'n cuan cho buan ri shnàmh.